

1309, 19 mai. – Sarzeau

*Acte de donation par Arthur II, duc de Bretagne, au profit des religieuses de l'abbaye Notre-Dame de La
Joie à Hennebont.*

AD56, 60 H 1

[En marge haute : « Le lendemain de la pentecoste », « Auray. Tiroir 26^e. Liasse quatrième. Cotté A. Rentes foncières et ducalles. Titre primordiaux », « N°1^e »]

/1/ Nous, Artur, duc de Bretagne, conte de Richemont, baillons et assignons a religieuses dames l'abbaesse et le */2/* convent de l'abbaie de La Joie de Nostre Dame de Henbont de l'ordre de Citeaux, en la diocese de Vannes, diz et oitt */3/* quartiers et quatre tiercelees de froment a la mesure de Elray¹ et unze quartiers et cinc tiercelees de seille² a la mesure */4/* desus dite. Et est assavoir que chascun quartier doit tenir oitt tiercelees, c'est assavoir chascune tiercelee de */5/* froment pour sis solz chascun an de rente et chascune tiercelee de seille pour cinc soulz chascun an de rente, */6/* a avoir et a prendre sus nostre censsive de Elray par la main nostre chastellain */7/* d'Auray par chascun an en nostre ville d'Auray a la feste de la Touz Sainz. Et est la somme dou pris d'icels blez sexante sept livres et treze soulz, */8/* lesquels treze solz nous leur quitames. Et ainsin demorent sexante et sept [li]vres pour lesqueles nous leur */9/* assignons et baillons les blez desus diz a james a rente perpetuel en rabatent de la somme de cent livres */10/* de rente que nous leur devons par chescun noel en deniers. Et voulons et otroions que le jour de la Touzsainz */11/* passe que si nostre chastellain d'Auray ou celui qui recevra ladite censsive estoit en defaut de rendre lesdiz blez */12/* dedenz la feste de Touz Sainz chascun an ausdites religieuses ou a leur commandement, que il paege chescun */13/* jour a icelles religieuses cinc soulz de paine de tant comme il en sereit en defaut passe ledit terme. Et si nostre */14/* censsive ne monteit la somme des blez desus diz nous suimes tenuz a leur parfaire juque a la somme desus */15/* dite et a les garantir sus les blez desus diz. Donne a Succeniou, nostre seau tesmoign, lendemain de la Penthecouste */16/* l'an de grace mil trois cenz et neuf.

¹ Mis pour « Auray ».

² Probablement mis pour « seigle ».